

LA CARTA DEL APOSTOL SAN PABLO A TITO

¹ Wejrtčha Pablutqui, Yooz mantitacama okiñ žoñtčha, nižaza Jesucristuž cuchanžquita apos-toltčha. Jesucristuqui wejr apóstol puestuquiz utchičha criichi žoñinacžquiz Yoozquin juc'ant kuzziz cjiskatzjapa, nižaza Yooz kamañ puntu ultim werara zizkatajo, ² nižaza arajpachquin Yooztan wiñaya kamz tjewzkatajo. Yoozqui ana toscara chiyasačha. Jalla niiqui arajpachquin wiñaya kamzjapa taku tjaachičha tuqui timpuquitztan-pacha. ³ Nekztan niiž pinsita timpuquiz Yoozqui nii kamz puntuquitztan kjanapacha kjanzt'ichičha paljayta liwriiñi Yooz tawkquitztan. Nii liwriiñi taku paljayajo, učhum Liwriiñi Yoozqui wejtquiz mantichičha. Jalla nižtiquitztan wejrtčha liwriiñi taku paljayni kamañchizqui. ⁴ Tito jila, jaziqui wejrqui amquin tii cartal cjiržcučha. Wejt maati cuntamčha. Amqui Yoozquin kuz lijtuma tjaachamčha. Jaziqui pucultan učhumqui Yoozquin kuzzizchumčha. Yooz Ejpžtan nižaza Jesucristo učhum Liwriiñižtan, amquiz yanapla, nižaza amquiz okzla, nižaza walikaj kamkatla.

ICLIZ JILIRINACAQUI ZUMA KAMZPANCHÁ

⁵ Creta yokquin wejrqui am ecchinčha, criichi žoñinacžquiz juc'ant zuma kamañanacchiz cjiskatajo, nižaza weriž mantitacama zapa wajtquiz icliz jilirinaca uchajo. ⁶ Icliz jilirinacaqui zuma kamzpančha: Zuma kamañchizlaj niiqui,

ana jakziltami čhjul ujmi tjeeznasačha. Icliz jilirinacaqui tsjaa tjunatanpanikaz cjispančha. Nižaza niiž maatinacaqui Yoozquin criiñi cjispančha. Nižaza niiž maatinacaqui zuma kamañchiz cjispančha, ana malcreado. Nižaza maa ejp cazñi kuzziz cjispančha. ⁷ Jakzilta icliz jilirit Yooz icliz cwitiñi puestuquiz uchta cječhaja, jalla niiqui zuma kamañchizkaz cjispančha, jalla nižtiquiztan ana jakziltami niižquiz čhjul ujmi tjeeznasačha. Nižaza ana persun kuzcamakaz pecñi cjispančha. Nižaza ana oralla žawjñi kuzziz cjispančha. Nižaza ana licñi kuzziz cjispančha. Nižaza ana kichjasñi kuzziz cjispančha. Nižaza ana ancha paaz pecñi kuzziz cjispančha. ⁸ Nižaza čhjul tjonzñinacžquizimi zuma kjawzñi kuzziz cjispančha. Nižaza zumanacapan pecñi kuzziz cjispančha. Nižaza zuma pinsamintuchiz cjispančha. Nižaza Yooz kuzcamapankaz kamñi kuzziz cjispančha. Nižaza Yoozquin tjapa kuz sirwiñi cjispančha. Nižaza persun kuz zuma ewjazñi cjispančha, čhjul uj paaz cjenami. ⁹ Nižaza apostoluž tjaajinta jaru ultim werar Yooz tawkquiz tjurt'ichi kuzziz cjispančha. Nižaza werar Yooz taku zuma tjaajincan, criichi žoñinacžquiz p'ekinchayasačha, nižaza Yooz tawk quintra chiiñinacžquiz ninacž ana zuma pinsamintunaca tjeeznasačha.

¹⁰ Creta yokquin walja ana zuma žoñinaca žejlčha, ana jiliri cazñi. Nižaza ina razunanacaž chiiñičha. Nižaza criichinacžquiz incallčha. Nižaza ninacaqui judío cuzturumpinac jaruzakaz kamz pecñičha. Ninacaqui juc'anti nižta ana waliž kamčha. ¹¹ Nii ana zum žoñinacaqui ana

wali tjaajinčha, paaz gansjapakaz. Jalla ninacž ana zuma chiiñi ataqui chawjcsinsa, ana nižta tjaajnajo. Ninacaqui ana wali tjaajincan, kjuychiz familiaranca intiru quejpskatčha. Jalla nižta ana wali tjaajinz ana waquizičha.

¹² Tsii Cret wajtchiz žoñiqui ariwiñitačha. Nii Cret žoñipacha cjichičha: “Cret wajtchiz žoñinacaqui toscar žoñinacapančha, nižaza malcreado žoñinacačha, nižaza walja lulní žoñinacačha, nižaza jayranacačha”. Jalla nuž cjichičha nii Cret žoñiqui. ¹³ Jalla nii žoñiqui razuna chiichičha. Jalla nižtiquiztan Cret wajtchiz anawal criichinacžquiz zumpacha ujznaquičha, Yoozquin tјapa kuzziz werar Yooz tawkquiz tjurt'ajo. ¹⁴ Nižaza chiižinaquičha judío quintunaca ana juyzu paajo. Yekjap žoñinacaqui werar Yooz taku anaž catokz pecčha. Jaziqui Cret žoñinacžquiz chiižinaquičha nii Yooz tawk quintra žoñinacž mantitanaca ana juyzu paajo.

¹⁵ Jakziltat Yooz kuzcama zuma kamčhaja, jalla niíqui čhjulu paacanami Yoozquin kuzzizpančha. Pero ana zuma kamañchiz ana criichinacaqui čhjulu paacanami ana Yoozquin kuzzizza, persun pecta kamzquinkaz kuzzizza. Ninacačha ana zuma pinsamintuchizkazqui. Nižaza persun uj paažcumi ana naazñičha. ¹⁶ Ninacaqui cjiñičha, “Yooz pajučha” cjican. Ultimquiziqui ana zuma kamñiž cjen Yooz quintrapanikaz kamčha. Yoozqui ninacaž ana zuma kamtiquiztan anaž juztazza. Ninacaqui Yooz kuzcama ana cazñipančha. Nižaza ninacaqui ana čhjul zuma paazmi atasačha.

2***ZUMA TJAAJINTA PUNTU***

¹ Tito jila, amqui zuma tjaajinta jaru tjaajnaquičha, jalla tužu: ² Chawc žoñinacaqui zuma ewjazñi kuzziz cjispančha. Nižaza rispitta kamañchiz cjispančha. Nižaza zuma pinsamintuchiz cjispančha. Nižaza Yoozquin tjapa kuzziz cjispančha. Nižaza zuma munaziñi kuzziz cjispančha. Nižaza tjurt'iñi kuzziz cjispančha. ³ Jalla nižta irata zakaz cjispančha chawc maatakanacami. Zuma kamañchiz cjispančha, jaknužt Yooz yujcquiz zuma kamz waquizičhaja, jalla nižta. Nižaza ana čhjul ana wal quintumi joojooñi cjispančha. Nižaza ana licñi kuzziz cjispančha. Nižaza parti maatakanacžquiz zumanaca tjaajiñipan cjispančha. ⁴ Nižaza parti maatakanacžquiz chiižinasačha, persun luctakžtanami maatinacžtanami zuma munaziñi cjisjapa. ⁵ Tur maatakanacaqui zuma pinsamintuchiz cjispančha. Nižaza anapanž yekja luctaka pinsispančha. Nižaza kjuya zuma cwitiñi cjispančha. Nižaza okzñi kuzziz cjispančha. Nižaza luctakž jaru cjispančha. Jalla nižta zuma kamtiquiztan anaž jecmi Yooz tjaajinta tawk quintra chiyasačha. Jalla nižta tjaajnaquičha chawc maatakanacaqui.

⁶ Nižaza tjowa luctakanacžquiz zakaz chiižinaquičha nižta zuma kamañchiz kamajo. Nii tjowa luctakanacaqui ewjazñi kuzziz cjispančha, ana čhjul uj paazjapa. ⁷ Ampacha zumapankaz kamz waquizičha. Jalla nižtiquiztan tjowa

luctakanacaqui am zuma kamñi cheržcu, nižta iratazakaz zuma kamasačha. Nižaza amqui tjaajincanaqui zumapan tjaajnaquičha zuma kuztan, nižaza humilde kuztan. ⁸ Jalla nuž amiž zuma tjaajintiquiztan anaž jecmi amquizi qui uj tjojtnasačha, “Ana wali tjaajinchamž amqui” cjicanaqui. Nižaza amiž zuma tjaajintiquiztan quintra žoñinacaqui azkataquičha. Ana čhjulumi am quintra uj tjeežni atasačha.

⁹ Amqui criichi piyunanacžquiz chiižinaquičha, ninacž patrunž mantita jaru cjejajo. Nižaza čhjulu paacanami patrunžquiz cuntintu cjiskatasacha, anapanž chayñi kuzziz cjispančha. ¹⁰ Nižaza anačha tjañi cjispanqui, antiz lijitumapanž cjispančha, zuma cumpliñi. Jalla nižta piyunanacaž kamtiquiztan, žoñinacaqui učhum Liwriiñi Yooz tjaajinta puntuquiztan “Walipančha” cjican chiyasačha.

¹¹ Yoozqui tjapa žoñinacalta Jesucristo cuchanžquichičha. Jaziqui jakziltat Jesucristužquiz kuzziz cjechaja liwriita cjesačha. Jalla nuž cuchanžquitaž cjen Yoozqui niiž okzñi kuzziz tjeezičha. ¹² Nii okzñi kuzziz Yoozqui učhumnacaquiz tjaajža, Yooz tawk quintra paatanaca ecajo, nižaza ana wal kuzquiztan pectanaca ecjo. Nižaza Yoozqui tjaajža, tii muntuquiz žejlcan persun kuz ewjazpančha čhjulu uj paaz cjenami, nižaza čhjulu ana wal chiiz cjenami. Nižaza Yooz kuzcama kamspančha. Nižaza Yoozquin tjapa kuz sirwispančha. Jalla nuž tjaajža Yoozqui. ¹³ Učhum Liwriiñi Jesucristučha pajk Yoozqui. Jalla niiqui zuma pajk obra tjeežcan tii muntuquiz wilta tjonaquičha.

Jalla niiž tjonz tjuñquiziqui cuntintuž cjequičha tjapa criichinacaqui. Jalla nižtiquiztan zuma kamcan niiž tjonz tjewznaquičha. Jalla nižta tjewz waquizičha, jalla nii tjaajža Yoozqui. ¹⁴ Nii tjonzni Jesucristuqui učhum laycu ticzičha, tjapa ana walinacquiztan liwriizzjapa. Ana walinacquiztan učhum liwriichičha, niiž partir žoñi cjiskatzjapa, nižaza učhumnacaquiz tlapaman zumanaca paaz ancha pecñi kuzziz cjiskatzjapa.

¹⁵ Jalla nii tjaajintanaca amqui zakaz tjaajinstančha, zumpacha chiižincan, nižaza p'ekinchaycan. Nižaza nii tjaajintanaca panž mantaquičha žoñinacaž nii tjaajinta jaru kamajo. Jilir puestuchiz cjen nižta mantaquičha. Nekztan amiž tjaajintiquiztanaqui anaj jecmi am iñarla.

3

PABLuz CHIIZINTA TAKUNACA

¹ Criichi žoñinacžquiz cjuñskataquičha jalla tužupan: Ninacžlaqui gobierno mantíni žoñinacžquizimi jilirinacžquizimi jalla ninacž mantuquiz zuma kamz waquizičha. Nižaza ninacaž mantitanaca caz waquizičha. Nižaza listupan cjispančha zuma obranaca langzjapa. ² Nižaza anaž jakziltižquizimi chjaawjkatasačha. Nižaza ana ch'aasni kuzziz cjispančha. Nižaza llan kuzziz cjispančha. Nižaza tjapa žoñinacžtan humilde kuzziz cjispančha.

³ Tuquiqui učhumqui ana criichi žoñinacazakaztačha. Yooz puntuquiztan zumzu ana zizñi kuzziztačha. Nižaza ana Yoozquin cazñi kuzziztačha. Nižaza tsjii kjutñi

cjicjiñčhumtačha. Nižaza učhumqui persun kuzcama ojklayiñčhumtačha, jaknužt učhum ana wal kuz pectčhaja, jalla nuž. Nižaza ana wal kuzziz kamiñčhumtačha. Nižaza tsjii želinchiz žoñižtakaz cjis pequiñčhumtačha ana wali zmazñi. Nižaza učhum ana wali kamtiquiztan žoñinacaqui učhum quintra žawjñitačha. Nižaza žoñinacžtan porapat chjaawjkatñi kuztan ch'aasiñčhumtačha. ⁴ Jalla nuž učhumnacaž ana zuma kaman učhum Liwriiñi Yoozqui niiž zuma kuzmi nižaza niiž okzñi kuzmi tjeezičha. ⁵ Jalla nižta okzñi kuzziz tjeežcu Yoozqui učhum liwriichičha. Učhumnacaqui tsjii lii jaru kamtiquiztan ana liwriitatačha. Pero učhum ana zum kuz awjžintaž cjen, nižaza Yooz Espíritu Santuqui učhumnac kuznacquiz luzziž cjen, Yoozqui učhum liwriichičha. Nekztan ew zuma kamaña tjaachičha. ⁶ Učhum Liwriiñi Jesucristuž cjen Yoozqui tjapa učhumnacaquiz niiž Espíritu Santo ancha zuma kuztan tjaachičha. ⁷ Yooz Ejpqui niiž okzñi kuzziz tjeežcu učhumnacaquiz nii favora paachičha, niiž yujcquiz zumapan cjisjapa. Nižaza Yoozqui učhumnacaquiz arajpach irinsa tanzñinaca cjiskatchičha. Nižta irinsa tanzñinacaž cjen učhumnacaqui tjewznačha Yooztan chica wiñaya kamzjapa.

⁸ Ultim weraračha Yoozquitztan tjaajintaqui. Nižaza zumpacha tjurt'iñi kuztan nii tjaajintanacquiz panž tjurt'aquičha, Yoozquin criichinacaž zuma kamzquin kuz tjaajo. Jalla nii tjaajintaqui ancha zumapančha, tjappach žoñinacžta. Nižaza zumapanž yanapčha Yooz kamañquiz juc'ant zuma kamzjapa.

⁹ Zumzu ch'aazñinacžquiz ana mitisa, nižaza zarakaquičha nii zumzu ch'aazñinacžquitztan. Nižaza tuquita atchi ejpnacž puntu parlita nonzquitztan zarakaquičha. Nižaza Moisés lii puntuquitztan ch'aasnan jalla nižtanaca nonzquitztan zarakaquičha. Tjapa nii ana wali parlitanacaqui inakazza. Zuma kamañchiz kami anapanž yanapčha.

¹⁰ Jakzilta icliz criichinacat pjali t'akačhaja, jalla nii žoñi kjawznaquičha. Nekztan chiižinaquičha tsjii wiltami pizc wiltami. Amiž chiižinta anaž nonznaquiž niiqui, iclizquitztan chjatkattaž cjequičha. ¹¹ Niiž ana nonžtiquitztan amqui zizzaquičha, nii žoñiqui ana zuma kuzzizpančha, nižaza tsjii kjutňi chjichta kuzzizpančha, jalla nii. Persunpacha niiž uj paata naaznasačha. Ancha ujnaca paaz pecňi kuzziz cjen castictaž cjequičha.

¹² Wejrqui amquin Artemas už Tíquico cuchanžcačha. Jalla niiž irantižquitan, amqui wejtquin uri tjonz pecalla. Wejrqui Nicópolis wajtquin želačha. Jalla nicju awti timpu watz tantiichinchá. ¹³ Nii tjurt'ižiňi Zenas awjatu, nižaza Apolos, jalla nii pucultan žoñinaca zumpacha despachaquičha amqui, ninaca ana čhjulumi pjaltizjapa. Nižaza zumpacha žaka cjižinaquičha ninaca ojkzjapa. ¹⁴ Nižaza učhum criichinacaqui zuma kamznacquiz kuz tjaaz waquizičha. Nekztan t'akjir criichi žoñinacžquiz yanapaquičha. Nižaza wacchi zuma obranaca tjeeznaquičha.

¹⁵ Tjapa wejttan chica kamňi žoñinacaqui amquin tsaanžquičha. Nižaza wejrmi amquin tsaanžcučha. Nižaza amqui wejtnaca k'ayi

criichinacžquiz tsaanžinaquičha. Yoozqui
amquiz nižaza tjapa nekz žejlñi criichi
žoñinacžtan zumapaj yanapla. Jalla nužoj cjila.
Amén.

Ew Testamento: Chipay Tawkquitztan New Testament in Chipaya (BL:cap:Chipaya)

copyright © 2009 Wycliffe Bible Translators, Inc.

Language: Chipaya

Translation by: Wycliffe Bible Translators, Inc.

Chipaya [cap], Bolivia

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chipaya

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022
baeaa6d6-fcc1-578f-afbd-04a9c5c14184